

Date – 27/12/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Esther Hnamte chu January ni 5 aH Mukesh Ambani te in Delhi a zai tura sawm a ni.
2. Kumin tangka kum thla 7 (April leh October thla inkar) chhung khan zinmi nuai 4, sing 4, sang 8 leh 28-in Mizoram an rawn tlawh.
3. Kum 1997 atanga tun thlengin Mizoramah zu chhe in vangin mi 56 an thi tawh.
4. Prime Minister Narendra Modi-a'n naktuk chawhma dar 11-ah Mann Ki Baat hun, Akashvani-ah a hmang leh dawn.

<><><>

ESTHER HNAME

Nimina India rama naupang chawimawina sang ber Pradhan Mantri Rashtriya Bal Puraskar chawimawina dawngtu Mizo naupang zaithiam Esther Lalduhawmi Hnamte chu India mihausa tawntaw Reliance Industries neitupa Mukesh Dhirubhai Ambani chuan kum thar January ni 5 hian a chenna Antilia, New Delhi-a mipa leh hmeichhe India Cricket team puala hun hmanna turah zai turin a sawm.

He thu hi vawiina Akashvani Correspondent in a biaknaah sawiin Esther Hnamte nu Pi R. Lalawmpuii chuan sawiin Pu Mukesh Ambani in a sawmna chu tukin zing khan telephone kaltlanga sawmna an dawn thu a sawi a. Tun dinhmunah chuan an sawmna chu an pawm dawn leh dawnloh an la sawitheih loh thu a sawi a, Esther Hnamte chu lawmman sem chhungin Kesari film hla ‘Teri Mitti’ sa tur beisei a nih thu a sawi bawh a ni.

Byte: Pi R Lalawmpuii (Estheri Nu)

Esther Hnamte hi vawiin chawhnu dar 3 a chanve vel khan amah hruaitute nen Lengpui tunhmunah an lo tum a. Lengpui tumhmunah hian chhung leh khat, amah ngaisangtu thenkhat te leh a awmna Lunglei College veng tlawmngai pawl hruaitu te chuan an lo hmuak a ni. An tum dan chuan naktukah Lunglei pan a lo haw leh an tum a ni. He tianga thlawhna a rawn thang mek an nih avangin engmah aw an la pawh chiah lova, zai ngei chu a tum dawn niin amah enkawltu Pu David Zawma chuan a sawi a. India rama Magazine lar Femina pawhin January thla a an Magazine kawma a thlalak dah atan an be fel tawh ni a thudawn a ni.

AIZAWL AQI

Urlawk zan khan Aizawl-ah halpuah leh halmawi hal an awm meuh loh avangin boruak a thianghlim tha hle.

Mizoram Pollution Control Board (MPCB) a mithiamte sawi danin urlawk zan (December ni 24) khan Aizawl Sikulpuikawn a boruak tha leh chhia tehna khawl chuan air quality index (AQI) chu 38 niin a chhiar a. Krismas ni pheikha chuan AQI hi 33-ah awmin nizan khan 38 a kai chho leh a. Aizawl boruak hi a thianghlim a, hriselna atana harsatna siam pha lova ngaih a ni a, 50 thleng hian a tha a ngaih a ni.

He tih lai hian Delhi khawpui a AQI chu vawiin khan 323 lai a ni a, hriselna atan a hlauhawm hle niin mithiamte chuan an sawi a ni.



TOURIST FOOTFALLS

Kumin tangka kum thla 7 (April leh October thla inkar) chhung khan zinmi nuai 4, sing 4, sang 8 leh 28-in Mizoram an rawn tlawh.

Tourism department director Pi R. Lalrodingi'n Akashvani Aizawl News a hrilh danin November leh December hi zinmi an tam ber lai a ni a. Department a he lam buaipuitute hi sorkarin pun khawm hrang hrang a buatsaiha an buai bakah mikhual awm zat hre theitu khualbuk neitute an buai avangin November thla a zinmi lo lut zat hi hriat hleih theih a la ni lo. Zinmi (tourists) nuai 4, sing 4, sang 8 leh 28 zinga nuai 2, sing 7, sang 8 leh 486 hi tualchhung mi an ni a, state pawn atanga lo zin hi mi nuai 1, sing 6, sang 2 leh 196 niin ramdang atanga lo zin (foreign tourists) hi mi 7,346 an ni. Sairang thlenga rel kawng a lo luh hnu, Guwahati, Kolkata leh Delhi atanga Aizawl khawpui daifem thlenga rel a a zin theih tak hnu hian ramdang atanga lo zin hi an pung nasa a rin sa a ni a, an pung hle tih a hriat bawk a ni.

Tourism department chhinchhiah dan chun October thla kha zinmi lo luh tam ber thla a ni a, zinmi 96,224 an lo lut a, an zinga 1,358 chu ramdang mi an ni. Kumin tangka kuma zinmi lo luh tam ber dawttu chu April thla kha a ni a, mi 67,872 an rawn zin a, September thla khan mi 65,880-in Mizoram an rawn tlawh a, August thla khan mi 63,830 in an rawn tlawh a. Tlawhtu tlem ber thla chu June thla kha niin mi 47,937 an rawn zin a ni.



CHRISTMAS FEASTS

Nimin Aizawl veng thenkhatah Mizoram pawn atanga lokal Krismas ruai theh ve an tam hle.

Ruai theh zingah hian ram chhung hmun hrang hrang atanga lokalte bakah ramdangmi (foreigner) pawh an tel a. Chanmari, Zarkawt, Dawrpui, Mission Veng, Khatla leh Kulikawn atanga thu dawn danin Mizoram pawn atanga lokal hnam dang thahnem tak chu biak-in inkhawmna bakah lenkhawmna-ah te telin ruai an theh hlawm a, nuam an tih thu an sawi nasa hle tih thu dawn a ni. Ram pawn atanga lokal mingo leh khawchhak lam hmelpute pawh an awm nual. Chanmari Presbyterian kohhran biakin-ah chuan inkhawm, lenkhawm leh ruaitheh a hnamdang tel ve an tam avangin kohhranin biak-in kawtah Bible tract an dah a. Hindi, Bengali leh English a ziahte chu an lo sem a ni. Kulikawn a awm Catholic kohhran Christ the King Cathedral-ah pawh state pawn ami mi engemawzatin ruai an theh ve a ni.

Aizawl a awm hlun mi thenkhat chuan kumin hi Mizoram pawn lammi Krismas lawmna inkhawm, lenkhawm leh ruaitheh a an tel tam ber kum a la nih thu an sawi a. Kum lokal leh zel turah pawh an la pun zel an beisei thu sawi-in chutiang lo dawl zo tura inbuatsaih chhoh pawh a la ngai dawn a ni an ti.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



HOOCH DEATHS

Excise & narcotics department chhinchhiah danin kum 1997 atanga tun thlengin Mizoramah zu chhe in vingin mi 56 an thi tawh.

He department hian kum 1997 a zu chhe in avanga thi mi 4 (hmeichhia pakhat leh mipa 3) an awm atang khan an chhinchhiah tan a. Hemi kuma zu chhe inte in hi methylated spirit (zu a methyle pawlh) avanga thi an ni. Zu chhe in vanga thi 56 zinga 49 hi mipa an ni a, hmeichhia 7 an awm bawk. Zu chhe in avanga thi tam ber kum chu kum 2001 kha a ni a, hemi kum hian mi 14 an ti a. Thi zinga 8 hi methylated spirit in an ni a, 6 erawh chu an zu in dinhmun tak hriat chian a ni lo. Zu chhe in vanga thi mi 56 zinga a tam ber, mi 36 chu methylated spirit a pawlh in vang a ni a. Eng ang zu chhia nge a nih hriat chian loh in vanga thi 12 an awm a, Myanmar sipai zu, BEDC an tih mai in vanga thi 6 an awm a, Pethidine telh in vanga thi 2 an awm bawk.

Zu chhe in avang hian kumtinin mi an thi lova, kum 1997 leh kumin inkar hian thi an awm loh kum a tam zawk, kum 28 chhung hian kum 17 chu zu chhe in vanga thi an awm lo a ni. Zu chhe in vanga thi an awm hnahnun ber pawh kum 2022 kha a ni. Zu in nasat avanga hrisel lohna leh natna-in a tlakbuak avanga thite chu excise & narcotics department hian an chhinchhiah tel lo a ni.



CHOLERA

Lawngtlai leh Siaha district a tuihri leng mek dinhmun chuan zia-awm lam a pan zel a, Myanmar ramri khar chhunzawm a la ni.

Siaha district Additional DC Pu Abraham Beirazi Khithie chuan ramri kharin zawm that a hlawh a, Tipa community health centre (CHC) a tuihri natna vei enkawl mek 6 bak chu kai thar an awm thu district health officer-te hnen atanga a dawn loh thu a sawi. Siaha district-ah hian November thla khan tuihri avangin mi 3 an thi a. Tun hnai atangin Lomasu, Lodaw, Lopu leh Khaikhy khua-ah te a leng leh a, nunna chan erawh chu an la awm lo. Addl. DC chuan tuihri natna kaite hi Myanmar lama bungraw phurlut thin lirthei khalhtute leh sumdawng vek an nih thu a sawi a. Ramri an kan tawh loh chuan tuihri leng dinhmun hi a zia-awm chho zel tura a beisei thu a sawi a ni.

Lawngtlai district-ah pawh tuihri kai thar report a awm lova, Lairam Isua Krista Baptist Kohhran (LIKBK) enkawl LCMC damdawi-in a tuihri vei ni a rinhlelh enkawl mek 8 an awm mek a. Puan tawh angin tun kar chho khan tuihri vei ni a hriat mi 4 an thi a, November a mi 6 thi nen Lawngtlai district-ah mi 10 an thi tawh a ni. Tuna tuihri avanga nunna chan mi 4 leh kai tharte sample hi Zoram Medical College & Hospital-ah thawn a ni tawh a, Laboratory-a endikna hmuh dan nghah mek a ni. LCMC damdawi-ina doctor sawi danin tuihri natna kaite hi Myanmar lam nena inhne hnai, ramri vela sumdawng leh chetla vek an ni a. Tualchhungah a la darh rih lo ni-a ngaih a ni.

Siaha leh Lawngtlai district thuneitute'n tuihri leng avanga Myanmar ramri an khar chu khar chhunzawm zel a la ni a. Myanmar lam atanga sumdawnga lo lut an awm hranpa loh avangin Mizoram atanga bungraw hralh tura kal dan vek an ni a. Chin state chhim lam Paletwa leh a chheh vel khua-ah tuihri hi a len avangin insumdawn tawna a Mizoram lam atanga inhnamnawihthe'n an kai tih hria-in ramri hi khar a ni a. Lawngtlai district bawrhsap chuan thla 2 chhung ramri hi kharin Siaha district thuneitute chuan kum thar January ni 4 thleng hi an khar phawt a ni.

MANN KI BAAT

Prime Minister Narendra Modi-a’n naktuk chawhma dar 11-ah Mann Ki Baat hun, Akashvani-ah a hmang leh dawn a, radio-a he hun a hman vawi 129-na tur a ni. Prime Minister thusawi hi Akashvani leh Doordarshan network zawng zawng bakah AIR News website-ah leh Newsonair mobile app-ah te tihchhuah a ni ang a, AIR New, DD News, PMO leh Ministry of Information & Broadcasting Youtube channel-ah te, live-a pek chhuah a ni bawk ang a. Prime Minister thusawi, Mizo tawnga lehlin tihchhuah zui a ni ang.

(NSD)



FOG DISRUPTS TRAIN SERVICES

Tiau chhum chhah tak zing vingin vawiin khan ramchhung hmun hrang hrangah rel tlan dan a buai a, Indian Railways sawi danin, rel service 19 chu darkar 2 chuangin an tlai a ni. Rel-a zin turte chu station an pan hma-in an chuanna tur rel dinhmun ngaihven hmasa tura ngen an ni.

Hetih lai hian India Meteorological Department (IMD) chuan Bihar, Haryana, Chandigarh, Delhi, Himachal Pradesh leh Punjab-ah ni 3 chhung, tiau chhum chhah tak a zing thei tih a sawi a, hmar chhak bial, Odisha, West Bengal, Sikkim leh Uttarakhand-ah te pawh kumthar Jan ni 1 thleng, tiau chhum chhah takin a bawh thei a sawi bawk.

(NSD)

<><><>